

# 11. Ander psalmen

**Jan Utenhove**

**bron**

Jan Utenhove *11. Ander psalmen*. Gillis van der Erven, Emden, 1559

Zie voor verantwoording: [http://www.dbnl.org/tekst/uten003ande01\\_01/colofon.htm](http://www.dbnl.org/tekst/uten003ande01_01/colofon.htm)

© 2001 dbnl



**11. Ander psalmen door J.V. Autheur der  
Duytscher ghemeynten (die te Londen was)  
sangkboeck, namaels daertoe in rijme, op  
sangswijse te samen ghestelt, ende nu op het  
eerste in drucke tot stichtinghe ende troost aller  
vromer Christenen wtgegaen.**

Ephes.5.c.19,

Wordet vol gheests, ende spreket onder malkanderen door Psalmen ende lofsanghen  
ende gheestelicke liedekens, singet ende Psalmet den Heere in uwen herten.

An. 1559.

## **Het Argument des 45. Psalms.**

Onder de figuer van dat houwelick Salomonis, met de dochter van Pharao, beschrijft ons Daud hier dat gheestelick houwelick Christi, met zijnder ghemeente, so Osee,2. *ende* Ephes.5. staet, ende Daud bewijst klaerlick, dat Christus warachtich God zy, *ende* oock warachtich mensche.

### **Eructait cor meum.**

#### **I V.**

My koemt te voren een rede goedt  
Die wt dat herte bersten moet,  
welck ick den Koninck wil toe-schrijuen,  
Mijn tongh is nu

seer wel ghemoedt,  
also te dichten met der spoedt,  
als een rasch schrijuer konde schrijuen.

Du bist de schoonste die daer leeft  
Dynen lippen ghenade aen kleeft  
Mits dat dy God seer heeft begnadicht  
Gordt aen dijn sweert met grooter kracht  
Gheweldich Vorst so groot geacht  
Suldy zijn door dijn wonderdaden.

Met spoet rijdt eerlick ouer breyt  
Op het woort der warachticheyt  
Tot den volcken met grooter eeren  
Vergheselschapt met sachtmoedicheyt  
End allerley gherechticheyt  
Dijn rechte hant sal dy wonder leeren.

Dijn pijlen sullen scherp en hart  
Doorgaen dyner vyanden hert  
Die volcken sullen voor dy vallen  
Dijn throon bestaet doch eewelick  
Den stat O God dijns Coninckrijcks  
Is des gherechticheyts staf in allen.

Du hebst lief de gherechticheyt  
En haet oock allerley boosheyt  
Daerom dat dy God bouen allen

+ Dijn metghesellen heeft ghesalft,  
Met der blyschap olij en salf,  
Die op dyn lidtmaten moet vallen.

Dijn kleyders wel rieckende zijn  
Na Myrrhe, Aloe en Cassi fijn  
Wt yvooren palaysen ghenomen  
Om dy alwech te maken vro  
Der Koninghen dochters daer toe  
In dynen dienst ghewillich komen.

Dijn bruyt staet dy ter rechter hant  
Verciert met goude van Ophir gent  
Hoort dochter siet neyght doch dijn oore  
Vergheet dijn volck als dreck en stof  
Vergheet dijns vaders huys en hof  
Cleeft hem aen hem alleen wilt hooren.

En den Coninck sal dijn schoonheyt frisch  
belusten want hy dijn Heere is  
Du salst hem dienen ende aenbidden  
Die dochter Syri met gheschenck  
Ende die de rijkste onder t'volck zijn  
Sullen oock voor dijn aenschijn bidden.

T'ciersel der koninghinnen schoon  
Is inwendich door s'konincks doen  
Haer kleedt is van goude gheulochten  
Den Coninck toe sal sy zijn bracht  
In kleyderen konstich ghewracht  
Met de maeghden die haer steits volghen.

In blyschap en verhoeghing groot  
Sullen sy buyten allen noot  
In s'konincks tempel ghebracht werden  
Voor dijn vaders sullen dy  
Kinders zijn die du stellet vrij  
Tot vorsten door de gantsche aerde.

Dijns naems met schrijuen wil ick seer  
Ghedachtich zijn so lang so meer  
Tot alle ewen en gheslachten

+ van der oueruloedt Christi,  
hebben wy al ontfanghen  
Jo.1 Hc.1. want hy is die  
rechte Faron waervan dat  
Psalmo 133. staet.  
So vermaendt Christus zijn  
bruyt so Luc.14. Joan  
12.staet.

Daerom sullen de volcken dy  
Belijden eewelick seer blij  
End dynen naem altijd groot achten.

### **Het Argument des 46. Psalms.**

Dauid hoochlick verblijdende, singet van Gods stercke macht, ende van zijn vaderlicke hulpe, ende bewijst dat hy vastelick op God betrouwt, ende niet vreest wat daer geschiet, na dien dat God met hem is. Desen Psalm verweckt oock alle kranck-gheloouighe, om op God te betrouwen, wanneer de goddeloose rasen ende veruolghen.

#### **Deus noster refugium.**

##### **I V.**

God is ons een toelucht en vaste borcht,  
In teghenheynt bystandich onbesorcht,  
dies sullen wy niet schricken,  
Al waert schoon dat

d'aerrijcke sou vergaen,  
 Of die berghen in Zee sick souden slaen,  
 wy souden niet verschricken <sup>+</sup>

Laet d'ruyschen t'meer en sick verheffen op  
 Laet die berghen met haren hooghen sop  
 Sick roeren en beweghen  
 Die beken schoon aller ghenadicheyt  
 Sullen Gods stat verhoeghen ouerbreyt  
 End s'Heeren woonst verheuen.

Midden in haer is God daerom sal sy  
 Niet wanckelen, want God sal se staen by  
 Al voor des morghen stonde  
 Die volcken zijn seer oproerich gheweest  
 Die Rijcken zijn door oploop oock beweecht  
 D'aerde is ghedroocht te gronde.

Maer voor ons is der heerscharen Heer besorcht,  
 Die God Jacobs is ons een vaste borcht  
 In alle teghenheden  
 Komet doch al en willet mercken aen <sup>+</sup>  
 Die wercken groot die de Heer heeft gedaen  
 Ende zijn wonderheden.

Ghenadelick weert hy de krijghen wreet  
 Totten eynde des gantschen aertrijcks breet  
 Maeckt die boose ter schanden

<sup>+</sup>Hoe seer dat de godloose  
 rasen so sullen sy Gods  
 woort niet wtroeyen, maer  
 het sal altijd de gemeynte  
 Gods vertroosten.

<sup>+</sup>Den vredelicken tijt in dat  
 geestelick rijcke Christi.

Die bogen sterck breect hy met grooten spoet  
De spiesen scherp maeckt hy te niet, en verboet,  
Die waghene ten lande. <sup>+</sup>

Staet doch af en my voor dijn God bekent  
Die daer groot ben in den wolcken bekent  
Ouer die gantsche aerde  
Met ons is der heerscharen Heer en God  
Die God Jacobs sal ons een vaste slot  
In noodt beuonden worden.

<sup>+</sup>God vermaent die  
gheweldige tot zijnder  
kennisse

## Het Argument des 52. Psalms.

De heylighe Daud straft de goddeloose die de goetheyt Gods verachten, de welcke ouermits dat sy op haer seluen staen, sullen haestelick vergaen, maer die gheloouighe die op God betrouwen, sullen groen zijn gelijk den Olijuen boom.

### Quid glorias.

#### I V.

Waerom roemdy du machtighe in boosheyd,  
die goetheyt Gods men daghelicks wel siet,  
Schand



en verderf dijn tong steits ouerlegt,  
Als een scherp schers dat buyten weghe schiet,  
Schadighen steits, wel doen bemint ghy niet,  
die loghenen beminstu meer dan t'rechte,  
tot schandelickheyt dijn valsche tonghe wrechtet.

God sal dy schenden ende dy dryuen vrij,

Wt dijn lant ende dijn Saedt te niete doen,  
 D'welck de vrome schouwende sullen sy,  
 Vreesen en oock bespotten de onvroen,  
 End segghen dit's den man die euen koen  
 Op God niet staet maer op zijn groote hauen  
 End sterckt sick in alle boose daden.

Maer ick sal den groenen olijue boom  
 Doch zijn gelijk in't huys des Heeren breyt  
 Want ick mijn hoop sekerlick sonder droom  
 In Gods goetheyt voor eewich heb gheleyt  
 Eewich sal ick tot dijn lof zijn bereyt  
 door dijn toesage wil ick dijn hulpe verwachten  
 Om dijns naems wil, dien die de vrome grootachten.

### **Het Argument des 67. Psalms.**

Dauid biddet God den Heere, dat hy niet alleen de Joden, maer oock de heydenen met zijn kennisse begauen wil, het welcke hy oock ghelooft dat gheschieden sal: Daerom vermaent hy oock alle volcken om God te louen ende te dancken.

#### **Deus misereatur noster.**

Ons' God wil ons ghenadich zijn,  
 En synen segghen gheuen,  
 verlicht ons met zijn aenschijn,  
 Hier end int eewich leuen,

Op dat wy heyden leern fijn,  
zijn weggen t'allen tyden,  
ende de salicheyt diuijn,  
die hy ons om verblijden:  
Ons schijnt sonder vermijden.

Die volcken dancken dy O Heer  
En prijsen dynen name  
Sy verhoeghen in dyner leer  
En iuychen vrolick t'samen  
Dat du recht vonnist dat volck al  
Dat hier woont beneden  
En leydet dat na dijn gheual  
In de hemelsche steden  
Daer blijerschap is met vreden

Die Heyden dancken dy eenpaer <sup>+</sup>  
Sy louen dy ghenadich  
Want du maeckt de aerde vruchtbaer  
En gheeft vruchten ghestadich  
En seghent ons met oueruloet  
Met dyne gauen krachtich.

<sup>+</sup>Alle gheestelicke ende oock  
lichemelicke segeninghen  
komen van God.

Du seghest ons tot ons behoedt  
Dies moeten wy ghedachtich  
Dijns wesen Heer almachtich.

### **Het Argument des 83. Psalms.**

Dauid begheert van God hulpe tegen die omligghende onbesneden natien, die *Jerusalem* ende die ghemeynte Gods altijd sochten te vernielen, desen Psalm is oock een gebet der Christenen, teghen alle Tyrannen ende poorten der hellen, die de kercke Christi willen ouerweldighen.

**Deus ne sileas.**

**I V.**

Swijcht doch niet Heer, O God wilt niet stil wesen,  
Verdraecht doch niet langher dit iammer wesen,  
Dijn vianden Want sy sick steken op,  
Die dy

haten verheffen haren kop,  
 teghen dijn volck listelick sy raedtslaghen,  
 teghen dijn erf hebben sy raet gheslaghen. <sup>+</sup>

Sy hebben geseyt laet ons nu gantz wtroeyen  
 dat se niet meer volck zijn noch niet en bloeyen  
 Dat gheen ghewach sy des naems Israel,  
 Gherooft hebben sy en teghen dy rebel  
 Een bont gemaect Edom ende Dismaeliten  
 Moab oock gaer end die Gebaliten.

Amon daer toe, Amalech de Palestijnen  
 Die van Tyro ende Assur met den synen  
 Die kinderen Loth hulpe hebben ghedaen  
 Laet hen den loon met Madian ontfaen  
 Met Sysara en Jabin aen kysons beken  
 In Endor al vergaen, soo't heeft ghebleken.

Maeckt dat al haer vorsten als Oreb varen  
 Als Cheb, Sebach Salmana sonder sparen,  
 Die daer seyden laet ons de woonste Gods  
 Besitten vrij als het deel onses lots,

<sup>+</sup>De Godloose verbinden  
 haer te samen teghen de  
 vroomen maer God maeckt  
 te niete alle haer raetslaghen,  
 ende vangt die in haer  
 wijsheyt.

Jerusalem latet ons nu vertreden  
End het gantsche lant met alle syne steden.

O God wilt se als een Rat onghestadich maken,  
Als een stoppel voor den wint door dijn wraken,  
ghelijck een vuer dat een groen wout verbrant,  
Ende als een vlam die de hooghe bergen brant,  
So laetse fel dijn onstuym weder vinden,  
Ende verslaetse met dyn harde draeywinden.

Haer aenghesicht wilt met schaemten versoecken,  
op dat also sy dynen naem besoecken,  
Maecktse beschaemt verslaetse in ewicheyt  
Gantsch ongeacht brengt in verdriet en leyt,  
Op dat hen mach dijn naem wel bekent werden,  
Ende dat du bist de Heer allein op aerden.

### **Het Argument des 85. Psalms.**

Dauid door den heylighen Gheest singht ende propheteert van der toekomste Messie, ende van zijn gheestelick Coninckrijcke, in't welcke gherechticheyt, vrede ende waerheyt sullen regneren, gelijk oock Esa. 11. staet, *ende* eyndelicken bewijst hy oock hoe der ghelouuiger sonden, door Christum wechgenomen zijn, so Danielis in't 9, *ende* Mich. 7. staet, ghelijckt oock het gheheele nieuwe Testament leert.

**Benedixisti domine.**

**I V.**

Dijn aertrijck Heer ghenade hebstu

ghedaen,  
Du hebst Jacob van den banden ontslaen.  
Du hebst dijns volcks boosheyt ghenomen wech,  
Sijn sonden al wt ghenaden hebst bedeckt,  
dijn gramschap groot, hebstu versoet ten eynde,  
End dynen thoorn daervan oock willen wenden.

Keert dy tot ons God onses salicheyts  
 Went van ons af den brant dijns toornicheyts  
 Wilstu alwech teghen ons zijn verstoort  
 Of dynen toorn vertrecken van nu voort  
 Bistu niet die, ons ten leuen wilt bringhen  
 waer voor dijn volck in dy sick sal ontspringen

Thoont doch O Heer ons dijn barmherticheyt,  
 ghenadelick gheeft ons dijn salicheyt  
 Hooren wil ick wat God de Heere mildt  
 Spreect, want tot zijn volck vrede spreken wilt,  
 Ende oock daertoe weldadich zijn tot allen  
 Op dat sy niet tot sotticheyt veruallen. <sup>†</sup>

T'heyl is voorwaer den godureesenden by  
 Op dat by ons d'heerlickheyt ware vrij  
 ghenade en waerheyt komen sick in't gemoet  
 Rechticheyt en vreed sullen sick kussen soet  
 T'ghelooue sal vast spruyten wt der aerden  
 gherechticheyt sal wt den Hemel gheschout werden.

De Heere sal oock zijn goedertierenheyt  
 Gheuen seer mildt en storten ouer breyt  
 Ons aerdtrijck sal zijn vrucht brengen voort  
 In oueruloedt al na des Heeren woort  
 Gherechticheyt sal voor den vromen treden  
 En ouer wech sal hy fijn gaen in vreden.

<sup>†</sup>Dit is den staet van den  
 gelucsaligen tijd des  
 geestelicken Konincrijcks  
 Christi.

## Het Argument des 86. Psalms.

Dauid met desen schoonen Psalm, bidt God, dat hy hem (mitsgaders dat hy onnoosel is) voor die listen der vyanden wil bewaren, ende zijn ghemoet met lust der doechden ende der godsalicheyt ontsteken. Ende eyndelick loeft hy de goetheyt ende de barmherticheyt des Heeren.

**Inclina domine.**

**I. V.**



O Heer neicht tot my dijn ooren,  
End wilt my als nu verhooren,  
Want ick all sins ben verdruckt,  
Gaet ellendich en bedrukt,  
Bewaer bid ick dy mijn leuen,  
Want tot doecht ben ick begheuen,  
Mijn God bewaer dynen knecht,  
Die sick dy betrouwet recht.

O Heer, zijt my doch weldadich  
 Goetgunstich ende oock ghenadich  
 My die so ootmoedelick  
 Dy aenbidde daghelicks  
 End wil dijns knechs siel verblijden  
 Die sick dijns roemet t'allen tijden  
 Want tot dy mijn Heer mijn God  
 Hert ende ghemoet hef ick op.

O Heer op dy wacht ick gheduldich  
 Want du bist sacht ende ghehuldich  
 Seer goedich tot alle man  
 Die dy van herten roept aen  
 Mijn ghebedt dan Heer volkomen  
 Tot dynen ooren laet komen  
 End hoor so du alwech doet  
 Myns biddens stem metter spoet. <sup>+</sup>

So haest als my noodt beuanghet  
 Tot dy roep ick met verlanghen  
 Want my pleegstu in't ghemeyn  
 By te staen end anders gheyn  
 Daer is gheen God te ghelijcken  
 By dy O Heer des aertrijcken  
 End daer is noch God noch man  
 Die dijn wercken na doen kan.

Alle dijn schepsel met hoopen  
 Sal tot dy komen ghelooopen  
 En sal dy aenbidden seer  
 En groot maken dijns naems eer,  
 Want du bist groot bouen maten  
 Ende van groote weldaden  
 Daerom hebstu desen prijs  
 Dat du gantsch alleyn God zijst.

O Heer wijst my dyne weggen  
 Dat ick wandele recht ter deggen  
 Bedwingt mijn herte dat het dy  
 En dijn name vreese vrij

<sup>+</sup>In allen noodt salmen God  
 alleen aen roepen, want hy  
 is't alleen die van den  
 beginne, die bedruckte hoort,  
 ende vertroost.

+ Mijn Heere God van gantscher herten  
Dijn lof wil ick stedes beherten,  
En dynen naem totter doot  
Sal ick altijd maken groot.

Want dijn goedicheyt ghepresen  
Hebstu aen my wel bewesen  
Mijn siel treckende wt der noot  
End vrijende van der doot  
Heer die grootsche my bespringhen  
En met grooten hoopen bringhen  
End staen na mijnder siele stracx  
Sonder op dy te hebben acht.

Maer Heer du bist seer barmhertich +  
Seer weldadich ende goethertich  
Lanckmoedich in toornicheyt  
Gaer goet en vol trouwicheyt  
Siet my aen zijt my ghenadich  
Gheeft kracht dynen knecht ghestadich  
End den soon dyner dienstmaeght  
Bewaer ende maeckt onuersaecht.

Wil doch een teecken ter deghen,  
Dyner goedicheyt my gheuen  
Op dat gantsch werden beschaemt  
Die my haten onbeschaemt  
End op dat het hen mach rouwen  
Wanneer sy sullen aenschouwen  
Dat du Heer my byghestaen  
En vertroosting hebst ghedaen.

+Die wegen Gods zijn ons  
onbekent ten sy datse ons  
God door zijn woort wijse,  
ende ons daerin doet  
wandelen.

+Een warachtighe  
beschrijuinge Gods, want hy  
is so veel als ons noodich is  
te weten so Ex 23. staet

## Het Argument des 94. Psalms.

Die heylige Daud straft in desen Psalm die Epicureen, Atheisten ende die goddeloose Tyrannen, die de godsalighe veruolghen ende benouwen, euen als of daer gheen God ware, die het merckt ende straffen sal, ende hy troost alle vrome die van sulcke veruolghinge lijden, segghende: dat se de Heere verlossen sal, *ende* dat hy de goddeloose straffen ende verderuen sal.

**Deus vltionem.**

**I V.**

O Heer en God der sonden wreker recht,  
God wreke recht wilt dijn kracht laten blijcken,  
Heft dy nu op O Rechter des aertrijcken,  
Om die grootsche te gheuen loon en recht,

hoe lang sullen die boose Heer hebben recht,  
Hoe lang sullen sy sick moetwillich draghen,  
Hoe lang sullen sy spreken met hoochmoedt,  
End in boosheyt sick roemen end behaghen.

Dijn ghelieft volck vrijuen sy vast ontween  
End dijn erfdeel seer schandelick sy plaghen  
Weduwen en vreemdelingen sy dootslaghen  
Weeskens bedruckt verworghen sy met een <sup>+</sup>  
Daerentusschen dencken sy op dy niet  
Maer segghen stout de Heer siet niet de saken

<sup>+</sup>So spreken oock de  
godloose Sap. in't 2 maer sy  
en sullen die straffe niet  
ontloopen. so 2. Pet.3 staet.

Den God Jacobs weet niet watter geschiet  
 Ende verstaet niet van t'ghene dat wy maken.

Wordet doch wijs onuerstandighe lien,  
 O ghy dwasen wanneer sulstu vroedt wesen  
 Die d'oor gemaect heeft hoe sal hy doof zijn  
 Die d'oogh gewracht heeft hoe sal hy niet sien  
 Die de volcken straft ende wetenschap gheeft  
 Den mensche al, soud' hy wilt dit betrachten,  
 V straffen niet, want de Heer is't die heeft  
 Ende bekent, aller menschen ghedachten. <sup>+</sup>

Wel salich is den man Heer die du strafst  
 En dien du hebst in dijn wet onderwesen  
 Op dat du dien, rust gheefst in teghenheden  
 Dewijl men den boosen eenen kuyl graeft  
 Want die sal zijn volck verwerpen niet  
 Sijn erfdeel oock, sal hy gheensins verlaten  
 Tot dat t'ghericht met gerechticheyt geschiet  
 Die de vromen gheensins sullen nalaten.

Wie sal voor my teghen de boose opstaen  
 Wie sal voor my staen teghen die boozdaders  
 Ten waer dat my de Heer gheholpen hadde  
 Mijn siel die waer nu schoon ter helle gegaen  
 Als ick oock dacht mijn voet is op den val  
 Dijn goedicheyt heeft my seer vast gemaket  
 Na d'hitte groot mijnder ghedachten al  
 So hebben my dijn troostinghen vermaket.

Hebstu iet ghemeyn met der Tyrannen stoel  
 Die daer verdruct onder den schijn van rechte  
 T'samen loopen sy onder schijn van rechte  
 T'onnoosel bloet dommen sy en maken koel  
 Maer den Heer is my als een vaste borch  
 Mijn God is my de steenroots mijns betrouwen  
 Vergelden sal hy hen t'boos onbesocht  
 En in haer quaet verdoemen se en benouwen.

<sup>+</sup>God castijt de syne wel  
 maer hy verworpt de syne  
 niet die hy verkoren heeft, so  
 Rom.8. ende 11. staet.

## Het Argument des 112. Psalms.

In desen Psalm beschrijft ons Daud die goetheyt ende milde liberaelheyt Gods, ende vermaent allen Christenen, dat sy met hantreyckinghe, die wt de warachtighe liefde koemt, God nauolghen, de sulcke sullen blijuen, maer de goddeloose worden wtgeroeyt, op dese wyse ende met dese woorden, vermaent oock Paulus alle Christenen, tot hantreyckinge 2. Cor. 8. ende 9.

**Beatus vir qui timet.**

**I V.**

Salich is de man die daer leeft.  
In rechter ontsicht des Heeren,  
End die een welgheuallen heeft,  
In zijn gheboden en leeren,  
Sijn zaet op aerden sal, krachtich zijn,  
End t'zaet der vromen

t'welck God oock sijn,  
In seghening sal vermeerē

Rijckdom en alle ouervloedt  
Sullen in zijn huys wesen  
Sijn gherechticheyt blijuen moet  
Hoe seer hy hier is in vreesen  
T'licht schijnt den vromen in duysterheyt  
End worden ghetroost in teghenheyt  
Door Gods ghenade ghepresen. <sup>+</sup>

Weldadich is de goede man  
Door wtlenen en gherieuen,  
End al zijn saken hy wel kan  
Met oordeel en stichting drijuen  
Salich is hy want door gheen gheual  
Beweecht hy nemmermeer werden sal  
Den vromen man sal steits blijuen.

Van t'quaet gheruchte dat ouer koemt  
Schroemt hy sick niet met allen  
Want hy sick in den Heere roemt,  
waer op t'herte is veruallen,  
hy staet vast en vreest oock gaer niet,  
Tot dat hy zijn vyanden siet,  
na zijn begheerte oueruallen.

Hy deelet wt met herten bly,  
En geeft van t'syne den armen,  
Sijn gerechticheyt blijuet vrij,  
Eewich mitds zijn ontfermen,  
Syrien thorne verheuen staet,  
vol eer, maer t'viants begheerte quaet,  
Sal haest vergaen met karmen.

Met verdriet en toorn is hy beuaen  
Dies bijt hy t'samen die tanden.

<sup>+</sup>Het officie des Christenen  
mensches, die van God met  
wterlicke segheninghe  
begaeft is, is dat hy mildelick  
wtdeelt als een goet  
dispensier.



Maer t'zijnder tijt sal hy vergaen  
Ende worden tot schanden  
Want des schalckens begheeren al  
Sal vergaen en komen ten val  
Ouer alle de landen,

### **Het Argument des 132. Psalms.**

Dauid van syne vyanden verdruct zijnde, begheert ende bidt hulpe van den Heere, toonende met een schoone gelijknisse des dienstknechts ende maeghts, syne sorchuuldige gehoorsaemheyt, die oock alle gheloouige sullen nauolghen.

**Ad te domine leuau.**

**I V.**

Mijn ooghen hef ick tot dy God alleyn  
bewooner der hemelen Heere,  
Recht als der knechten ooghen ghemeyn,  
Sien op de milde hant haerer Heeren,  
End

als der maeghden ooghen sien vrij,  
op haer vrouwen hant, So sien wy,  
Op God en onsen Heere. <sup>+</sup>

So staen wy op onsen God en Heer,  
Tot hy sick onser erbarme  
Goedertierenlick doet met ons Heer  
Ghenadelick hoort ons karmen  
Want wy van smaedtheyt zijn versaedt  
Ons siel is sadt van der rijcken smaedt  
End der grootscher, O Heer erbarmet.

<sup>+</sup>Gedult ende  
lanckmoedicheyd Dauids in  
het cruyce ende lijden.

### **Het Argument des 142. Psalms.**

Desen Psalm Dauids, die hy tot GOD ghesonghen heeft, als hy van Saul vloodt, ende in een hol verborghen was, is een warachtich ghebedt voor alle Christenen, in cruys ende lijden, als sy oock van de menschen verlaten zijn.

**Voce mea ad dominum.**

**I V.**

Met mijn stem tot den Heer ick roepen wil,  
In myne nootwendicheyde  
Met mijn stem tot den Heer ick bidde stil,  
Versekert van zijn goetheyde,  
Voor hem ick gantsch wtstorten sal,  
Mijn belang, noodt verdriet misual,  
In allerley teghenheyden.

Als mynen gheest met angst beuanghen is  
 Kenstu alle mijn weggen  
 Dat sy my onrecht doen is my bewist  
 Met stricken ben ick beleggen  
 Wan ick't alwijts en zijts sie aen  
 Gheenen aenwijser ick schouwen kan  
 In't vluchten is't my al teghen. <sup>+</sup>

Niemant heeft mijnder sielen eenich acht  
 Dan du O mijn God alleyne  
 Daerom roep ick tot dy seer wel bedacht  
 Mijn toevlucht en leefdeel reyne  
 Aenmerckt mijn klaghe want ick nu saen  
 Ben kleyn gheworden en kan niet staen  
 Teghen mijn vyanden ghemeyne.

Verlost my van alle veruolghers fel  
 Die my benouwen en roouen  
 Leydt mijn siel Heer wt alle ghequel  
 Op dat ick v prijse en loue  
 Dan sullen die gherechtighe soet  
 My omringhen en troosten vroet  
 End prijzen v Heer hier bouen.

<sup>+</sup>David van alle menschen  
 verlaten wesende, neemt zijn  
 toevlucht tot God, het welck  
 wy ooc na zijn exempel  
 sullen na doen.

## Het Argument des 145. Psalms.

Met desen lofsanghk die gaer fijn ende treffelick is, prijst ende loeft David, de mogentheyte goetheyte ende voorsienicheyte, mitsgaders oock die barmherticheyte Gods, die hy aen alle creaturen bewijst, maer in sonderheyte aen de gheloouighen, de welke hy hier in troostet, ende tot blyschape ende vrolickheyte vermaent.

**Exaltabo te domine.**

**I. V.**

Mijn Heer mijn God Koninck vol alder eeren,  
dy verheffen en dynen naem vermeeren,  
daghelicks wil ick, dy louten ende prijsen,  
End eewelick dijn grootmaking bewijsen,  
want seere groot end oock niet om doorgronden,

Is dijn goetheyt Heer tot allen stonden.

Alle eeuwen Heer end oock alle geslachten  
 Die moeten steits vertellen dyne krachten  
 Dies wil ick Heer dynen lof schoon verbreyden,  
 En spreken vrij van dijn wonderlickheden  
 So dat niemant dijns sterckheys sal vergeten  
 Maer yghelick sal van dijn groot wonder weten.

Dijns goetheys groot, salmen ghedachtich wesen,  
 Dijn gherechticheyt, vrijelick sal zijn gepresen,  
 Die Heer is seer weldadich en barmhertich,<sup>+</sup>  
 Tot toornicheyt lanckmoedich ende soethertich,  
 Tot allen goet zijn bermherticheyt alleene  
 Te bouen gaet alle zijn wercken reene.

<sup>+</sup>Daer is ter werelt gheen  
 creatuer, die niet oorsake  
 heeft de barmherticheyt Gods  
 te prijzen, want men die siet  
 in alle creaturen.

Dijn wercken al dy stedes Heer belijden  
 Dy prijsen oock, de vrome t'allen tijden  
 Die heerlicheyt dijns Coninckrijcks vermelden,  
 Die menschen fijn, ende oock dijn kracht onselden  
 Op dat sy dijn schoon daden openbaren,  
 End d'heerlickheyt dijns koninckrijcks verklaren.

Dijn Rijck is Heer een eewich Rijck vol krachten,  
 En dijn gheweldt duert in alle gheslachten,  
 Die Heer bewaert en houdt vast die daer vallen,  
 Hy recht oock op die daer zijn oueruallen,  
 Aller ooghen staen op dy aen alle

zijden <sup>+</sup>

En du gheefst hen spijsen in bequame tijden.

Du doest dijn hant open so wort ghesadicht  
Door dy al wat met athen is begnadicht,  
De Heer is recht in alle syne paden,  
Goedertieren is hy oock in zijn daden,  
De Heer is by alle die hem aenroepen  
die sick op hem in der waerheit beroepen. <sup>+</sup>

Hy doet den wil der ghener die hem vruchten,  
End verhoort haer klaghen ende suchten  
Die Heer bewaert alle die hem beminnen,  
End verderft, die boos zijn van hert end sinnen,  
Des Heeren lof ick altijd vermonden  
End alle vleesch, sal synen naem steits konden.

Finis.

Ghedrukt te Embden, by  
Gellium Ctematium.  
An. 1559.

<sup>+</sup>God door zijn segheninge  
ende genade spijset ende  
voed alle dat leuen heeft.

<sup>+</sup>Merckt de kracht van der  
vreese Gods.